

**Qasigiannugit Aasiaallu akornanni erngup nukinganik nukissiorfiliornissamut misissuineranut atatillugu nunaqarfiit qanigisaaniittut erngup nukinganik nukissiuutillu ataavartut allat atorlugit nukissiorfilernissaannik periarfissat misissoqqullugit peqquneqarnissaannik siunnersuut. Misissuinermi Igalikumi nukissiuutinik ataavartunik assigiinngitsunik atuinermik misileraanermit maanna ingerlasumit misilittakkat ilanngunneqassapput misissuinerullu inernera kingusinnerpaamik UKA2017-mi Inatsisartunut saqqummiunneqassalluni.**

*Inatsisartunut ilaasortaq Ane Hansen,*

**pillugu**

**Sanaartornermut ataatsimiititaliap**

**ISUMALIUTISSIISSUTAA**

**Siunnersuutip aappassaaneerneqarneranut tunniunneqartoq.**

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Kalistat Lund, Inuit Ataqatigiit, siulittaasoq

Inatsisartunut ilaasortaq Mala Høy Kúko, Atassut, siulittaasup tullia

Inatsisartunut ilaasortaq Anders Olsen, Siumut

Inatsisartunut ilaasortaq Jens-Erik Kirkegaard, Siumut

Inatsisartunut ilaasortaq Bendt Kritsiansen, Inuit Ataqatigiit

UKA 2016-imi ull. 25. oktober siullermeereernerani siunnersuut Ataatsimiititaliap misissorpaa.

### **Siunnersuutip imarisai siunertaalu**

Nukissiuutinik erngup nukissiuutaaneersuniunngitsoq allanik atuilersinnaaneq pillugu kiisalu nunaqarfinni nukissiuutinik ataavartunik assigiinngitsunik atuisinnaaneq pillugu Naalackersuisut misissuisinneqarnissaat siunnersuummik siunertaavoq, misissuinerullu inernera kingusinnerpaamik UPA2017-mi saqqummiunneqassalluni.

### **1. Siunnersuutip Inatsisartuni siullermeerutaasumik suliarineqarnera**

Amerlasuunit isumaqatigiissutigineqarpoq siunnersuut pitsaasuusoq. Siunnersuutip tunuliaqutaa ataatsimiititaliamut suliassanngorlugu innersuunneqarpoq, taamaalilluni

siunnersuummi taaneqartut saniatigut allanik periarfissaqarnersoq misissorneqarsinnaaqullugu.

### **Ataatsimiititaliap siunnersuummik suliaqarnera**

Ataatsimiititaliap misissuinerminut atatillugu Aningaasaqarneq pillugu nassuiaat kingulleq oqallisigaa. Tassanilu qupp. 67-68-imi una atuarneqarsinnaavoq::

“Annertunerusumik nammineq imminut nukissiornikkut pilersulernissamik takorluugaq angussagaanni, ataavartumik nukissiornissamut annertuumik, piffissalli ingerlaneranut agguataarneqarsinnaasunik aningaasaliissuteqartoqartariaqarpoq. Nukissiorfiit nukissiorneranni 2030-mi nukissamit ataavartumit nukik atorneqartoq minnerpaamik 90%-iussaaq. 2014imi Nukissiorfiit nukissiarisaasa 67,8 procentii ataavartumik nukissiornermeersuupput, nunarput ataatsimut isigalugu nammineq nukissiaq 17,4 procentiulluni.

Naak ukiuni kingullerni 30ni ataavartumik nukissiornermut annertuumik aningaasaliisoqarsimangaluartoq, soorlu erngup nukinganik nukissiorfiit Nunatsinni aningaasatigut isertitat 1 procentiata miss. Ukiut ilaanni aningaasaliissutigineqartarnikuullutik, maannakkut siunissaq eqqarsaatigalugu nukissiornermut politikikkut angusaqarneruniarnissaq pisariaqarpoq.”

Siunniunneqartutut saqqummiunneqartoq angusaqarluarusullunilu anguniagaq Ataatsimiititaliamit tapersorneqarpoq.

Aamma UKA 2015/34 apeqquteqaat aallaavigalugu Kalaallit Nunaat suli minguinnerusoq Inatsisartuni oqallisissiatut siunnersuutigineqartoq pillugu isummersornerit ataatsimiititaliap misissorsimavai.

Kiisalu Naalackersuisut UPA2016/118-imut tunngatillugu isumaliusersuutaat ataatsimiititaliap maluginiarpai

”Kalaallit Nunaanni nukissiuutit ataavartut annertunerusumik atorneqarsinnaanerisa Naalackersuisunit pingaartinneqarnera erseqqissaatiguarparput. Tamanna erngup nukinga atorlugu nikissiuutit, seqerngup qinngorneri atorlugit nukissiuutit atorlugit, ikuallaaviit aqqutigalugit kiammik pilersinneqartartumik atorluaanikkut nukissiuutillu ataavartut allat aqqutigalugit pisinnaavoq. Nukissiuutit ataavartut illoqarfinni nunaqarfinnilu atortariaqarpavut, taamaattorli nukissiuutit ataavartut eqqortut atornissaan-nut misissuisariaqarluta. Aaqqiissutissat avatangiisinut mingutsitsiviunngitsut aammalu inuiaqatigiit aningaasaqarniarnerannut iluaqutaasussat. Allanut akissaqanngilagut – aningaasaqarniarneq silallu pissusii eqqarsaatigalugit.”

Tamanna ataatsimiititaliap akuersaarpaa.

Taamaattorli ataatsimiititaliap maluginiaqquaa illoqarfiit nunaqarfiillu akornanni ataatsimut pilersuisinnaanerup arlaatigut pitsaaquteqarsinnaasoq. Tamanna assersuutigalugu nunap immikkoortukkaarlugu nunaluunniit tamakkerlugu nukissiuuteqarnikkut ataqatigiissaagaasumik pilersitsinikkut pisinnaavoq, tamatuma internetimut attaveqaasersuinerup suliarineqarneranut kattutsinneqarsinnaanera isumaliutigineqarsinnaavoq; tamannattaaq erngup nukissiorfiini nukissap pilersitap atorneqanngitsup atorluarneqarneranut atatillugu aamma pisinnaavoq, taasani brintimik sumiiffinnut mikinerusunut assartorneqarluni tassani ikummatissanik atuinerup annikillisarneqarneranut atorneqarsinnaasumik, pilersitsisoqarsinnaalluni.

Ataatsimiititaliap maluginiarpaa Naalakkersuisut UPA2016/118-imut atatillugu nalunaarutigereeraat, sammisami immikkoortumut pilersaarummik, siumut ikiuni qulini atuuttussatut naatsorsuutigineqartumik, suliaqartoqartoq.

Immikkoortumut uunga akissuteqaammi erserpoq immikkoortuni pineqartuni nukissiuutit ataavartut pillugit misissuinerit aallartereersimasut Igalikumilu misiliutaasumik ingerlatsineq aamma aallarnisarfimmiittoq, tassanngaanniillu paasissutissanik 2017-imit katersaqalertoqassalluni.

Ataatsimiititaliap aamma maluginiarpaa pingaartillugulu, siunnersuummik saqqummiunneqartumik amerlassusiliinissaq pillugu erseqqissunik piunasaqaatinik ikkussisoqarsimanngimmat.

Taamaalilluni ataatsimiititaliap ataatsimut naliliineraa, misissuinerup inernerigallagaanik, immikkoortunut pilersaarutit neriorsuutigineqarsimasut ilaannik attuumassuteqartunik imaqartumik, Naalakkersuisut saqqummiussisinnaasariaqartut, tassani aamma Igalikumi misiliummik ingerlataq pillugu suliamut Naalakkersuisut naliliinerannik inerniliinerannillu. Tassani aamma brintip siunissami ikummatissanut imerpalasunut taartit atorneqarsinnaanera pillugu nalilersuinernik.

### **Siunnersuutip aningaasaqarnikkut kingunissai**

Aalajangiiffigisassatut siunnersuutip piviusunnigortinneqarnerani aningaasaqarnikkut allaffissornikkullu kingunerisassai siunnersuummut tunngavilersuummi nassuiaatigineqartassasut Inatsisartut suleriaasianni § 33, imm. 1-imi allassimavoq.

Ataatsimiititaliamit maluginiarneqarpoq siunnersuutip piviusunngortinneqarnerani aningaasaqarnikkut kingunerisassat tamanna naapertorlugu siunnersuummi oqaatigineqartut, tassalu misissuinerup suliarineqarnissaa, AC-fuldmægtigip ukioq naallugu sulisup affaata missaata 250.000 kr.-inik nalillip annertoqataanik akeqassasoq.


Suliassat siuliani taaneqartut maanna ingerlanneqarlualereersut Naalakkersuisut akissuteqaamminni oqaatigigaat Sanaartornermut Ataatsimiititaliamit maluginiarneqarpoq, tamannalu tunngavigalugu misissuinerup suliarineqarnissaanik suliassaq siunnersuuteqartup 250.000 kr.-inik missingigaasa iluini ingerlanneqarsinnaanerata qularinissaanut pissutissaqarnani.

**Ataatsimiititaliap inassuteqaatai**


Paasinninnerit qulaani oqaatigineqartut tunngavigalugit imatut inerliliisoqartariaqarpoq:

**Ataatsimiititaliap isumaqatigiittup siunnersuutip akuersissutigineqarnissaa inassutigaa.**


Ataatsimiititaliap taamatut oqaaseqarluni isumaliutissiissumilu oqaatigineqartutut paasinnilluni siunnersuut aappasaaniigassanngortippaa.



Mala Høy Kuko,  
Siulittaasup tullia



Kalistat Lund, Siulittaasoq



Anders Olsen



Bendt Kristiansen



Jens-Erik Kirkegaard